

52

SOALAN NO.: 120

**PEMBERITAHUAN PERTANYAAN DEWAN RAKYAT**

**PERTANYAAN : BUKAN LISAN**

**DARIPADA : YBHG. DATUK NOR EHSANUDDIN BIN MOHD  
HARUN NARRASHID**

**SOALAN :**

**Datuk Nor Ehsanuddin bin Mohd Harun Narrashid minta MENTERI  
PERUSAHAAN PERLADANGAN DAN KOMODITI menyatakan apakah  
pelan strategik Kementerian dalam memastikan harga komoditi sentiasa  
stabil di pasaran.**

**JAWAPAN :**

Tuan Yang Di-Pertua,

Harga produk-produk komoditi negara seperti sawit, getah, kayu-kayan, koko dan lada memang sangat sensitif dan dipengaruhi oleh keadaan pasaran di peringkat antarabangsa. Sungguh pun demikian, Kementerian sentiasa memantau dan berusaha untuk mengurangkan kesannya ke atas pengusaha-pengusaha komoditi terutamanya golongan pekebun kecil melalui inisiatif-inisiatif seperti berikut:

- (i) mempelbagaikan penghasilan produk-produk nilai tambah di peringkat hiliran supaya permintaan ke atas bahan-bahan mentah komoditi terutamanya sawit dan getah terus meningkat. Permintaan yang tinggi akan menstabilkan harga komoditi. Untuk itu, penggunaan sawit sebagai bahan campuran ditingkatkan di bawah Program Biodiesel B7;
- (ii) menggiatkan R&D untuk menghasilkan klon bahan yang lebih produktif, penghasilan input pertanian yang lebih berkesan dan produk-produk hiliran baharu berasaskan komoditi;
- (iii) meningkatkan kaedah pengurusan ladang dengan lebih berkesan dan *cost-effective* melalui *good agricultural practices* (GAP) dan pensijilan seperti Minyak Sawit Malaysia (MSPO) yang boleh meningkatkan hasil dan mengurangkan kos pengeluaran;
- (iv) menyediakan bantuan dan insentif untuk mengurangkan beban kos awalan pengusaha ladang;
- (v) mempromosi produk-produk komoditi supaya terus mendapat tempat dan permintaan di peringkat global;

- 54
- (vi) menjalin kerjasama dengan negara-negara pengeluar komoditi yang lain di bawah kerangka seperti *International Tripartiate Rubber Council (ITRC)* bagi memperkukuhkan harga getah, *Council of Palm Oil Producer Countries (CPOPC)* bagi sawit dan *International Pepper Community (IPC)* bagi lada.

Tuan Yang Di-Pertua,

Penentuan harga komoditi di peringkat *farmgate* di Sabah dipengaruhi oleh beberapa faktor seperti cukai jualan yang dikenakan oleh Kerajaan Negeri, kos pemprosesan dan kos pengangkutan. Untuk memastikan pekebun-pekebun kecil komoditi di Sabah terus menikmati pulangan yang baik, Kementerian telah menyediakan bantuan dan insentif yang boleh membantu pekebun kecil meningkatkan hasil pengeluaran dan produktiviti komoditi termasuk pembinaan jalan-jalan ladang dan pusat pengumpulan bagi mengurangkan kos pengeluaran. Dengan adanya bantuan ini, kos awalan dan penyediaan infrastruktur ladang tidak lagi perlu ditanggung oleh pekebun kecil.

Sekian, terima kasih.